



O Goberno pide desculpas á cidadanía polo retraso na cabalgata de Reis 2015 segundo o horario previsto inicialmente

- **A avería de dúas das carrozas reais provocou o retraso na chegada das súas maxestades os Reis Magos á Praza Maior**
- **A empresa encargada da cabalgata asume a responsabilidade polos imprevistos que xurdiron ao longo do percorrido**

Ourense, 5 de xaneiro de 2014

A concelleira de Cultura, Ana Garrido, pediu esta tarde noite desculpas á cidadanía polo retraso na chegada das súas maxestades os Reis Magos á Praza Maior, o último punto do itinerario.

A avería en dúas das carrozas reais provocou un retraso sobre a hora prevista inicialmente no percorrido, que abranguiu a Estación Empalme, a Avenida das Caldas, a Ponte Romana, a rúa Progreso, Doutor Marañón e por último, a Praza Maior da cidade. Tal e como estaba previsto, repartíronse no percorrido un total de 3 toneladas de caramelos, e participaron máis de 300 persoas en forma de seres máxicos, animais fantásticos e moita música.

A concelleira matizou que, a pesar deste pequeno infortunio, tódolos nenos e tódalas nenas da cidade manterán intactas as súas ilusións para a chegada dos reis magos aos seus fogares, e engadiu que “foi unha mágoa que os reis non quixeran empregar a súa maxia para resolvelo de inmediato. Optaron por viaxar xuntos e chegar nunha mesma carroza á Praza Maior, onde centos de nenos e nenas os recibiron cos sorrisos que as súas maxestades merecen neste día que nunca esquecerán”.

Garrido pediu á cidadanía que este imprevisto non faga deslucir o rico programa da Concellería de Cultura nas Festas de Nadal, no que se celebraron múltiples actividades cun gran éxito de participación: concertos de Nadal, visita do Apalpador, obradoiros de construción de marionetas, a 11 edición da MOTI, a chegada de Papá Noel, a gran festa de Aninovo e o concurso de Beléns, entre outros.

A empresa responsable da organización da cabalgata de Reis, asume a responsabilidade polas averías que se produciron que responden a feitos fortuitos, xa que as carrozas foron creadas ex profeso para a cabalgata de xeito artesanal e probadas en situación de choiva, xeada e pendente.